

Nioqqutissanik eqqussuinermit akitsuutit pillugit Inatsisartut inatsisaata allangortinnissaanut, taamaasilluni tipigissaatit, pinnerstaatit eqqiluisaarnermullu atortut eqqussinermut akitsuutaat (Akitsuutit normuat 090) peerneqarluni, Naalakkersuisut siunnersuummik saqqummiussaqaarnissaannik piunaffigineqassasut Inatsisartut aalajangiiffigisassaattut siunnersuut.

(Inatsisartunut ilaasortaq Nivi Olsen, Demokraatit)

Akissuteqaat

(Aningaasaqarnermut Akileraartarnermullu Naalakkersuisoq)

Siullermeerneqarnera

Qujanaq siunnersuummut.

Tipigissaatinut, pinnerstaatitut eqqiluisaarnermullu atortunut akitsuutip atorunnaarsittariaqarneranik siunnersuummik saqqummiussaqaartoq Naalakkersuisut isumaqatigaat. Tassaavoq akitsuut aqukkuminaatsuullunilu ullutsinnut naleqqukkunnaarsimasoq.

Akileraartarnermik akitsuutinillu aqqissuusseqqinnissami ”Tamatta nunarput najoruminarnerulersitsigu”-mi alloriarnertut siullertut 2024-mi upernaami ataatsimiinnermut eqqussuinermit akitsuutinik arlalinnik atorunnaarsitsinissaq pillugu Naalakkersuisut siunnersuummik saqqummiussaqaarput. Naalakkersuisut ilaatigut tipigissaatinut il.il. akitsuut sapinngisamik piaarnerpaamik atorunnaassasoq siunnersuutigaat. Inatsisissatut siunnersuummi takuneqarsinnaasutut akitsuutinik atorunnaarsitsineq 2025-mut aningaasanut inatsimmi sipaaruteqarfitsigut aningaasaliiffigineqassaaq.

Tamatuma saniatigut Naalakkersuisut ilisimatitsissutigisinnaavaat, siunnersuummi Nunatta Kitaata sineriaani sodavandinut aamma mineralvandinut kulysreqartunut akitsuutip literikkaanit 7,50 kr.-nit literikkaanut 5,75 kr.-nut appartinneqaarnissaa siunnersuummi kaammattuutigineqartoq, taamaalilluni nunami tamarmi akitsuutaasoq assigiilersinneqassalluni. Taakku saniatigut ullumikkumit qummoroortaatitut akitsuut akiligassiissutini akip 100 pct.-ianit 50 pct.-ianut appartinneqassaaq.

Akitsuutinik appartitsinerit taakku akitsuutinut iluanaarutini ukiumut 15,5 mio. kr.-t missaannik appariarnek assigaat.

Naalakkersuisut akileraartarnermik aqqissuusseqqinnerat ukiut arlallit ingerlassaaq. Aqqissuusseqqinnermut tunngavigisatut isumaqatigiissummiippat ukiuni takkuttussani taakkunani siunnersuutinik saqqummiunneqartussanut tunngavissiissussat suliassat aamma aqqissuusseqqinnermi illinerit arlallit. Naalakkersuisut isumaqatigiissummi tunngavigisat malillugit aqqissuusseqqinnerup atuutilernissaa, aammalu isumaqatigiissummi malitassarititaasutut tulleriarinerit nakkutigeqqissaarniarpaat.

Tamanna tunngavigalugu aalajangiiffigisassatut siunnersuutip itigartinneqarnissaa inassutigineqarpoq, suliassaqarfimmi pilersitassamik Naalakkersuisut namminneq ingerlataqareermata.